

# 1224 (1809) SENESİNDE RUS SEFERİNE GİDECEK OLAN KAPUKULU OCAKLARININ İSTANBULDAN HAREKETLERİ ESNASINDA TEŞRİFAT MUCİ-BİNCE YAPILAN MERASİM \*

*Prof. İ. HAKKI UZUNÇARŞILI*

*Balıkesir Mebusu, T. T. Kurumu âzasından*

Bonapart birinci konsül olduktan sonra Mısırın istilâsı dolayısıyla iki devlet arasında hasıl olan bürudeti izale için İstanbula gönderdiği general Sebastiyani vasıtasıyla yaptığı teşebbüsler iyi netice vererek eski dostluk iade edilmişti; bu dostluğun iadesinde yeni nizam üzere ıslahat yapmakta olan üçüncü sultan Selimin dahli olmuş ve Parise kadar giden Âmedci Galip efendi (Galip paşa) dostluğun iadesi için bir muahede akdine muvaffak olmuştu.

Daha sonra imparator olan Napolyon Bonapart, Avrupada kendisinin hasmı olan İngilizlerin müttefiki devletlerle çarpışırken bu meyanda Rusya ile de tutuşmuştu. Rusya devleti, Napolyonun Osmanlı hükümetiyle dost olması ve Dalmaçya sahillerinden ve Türkiyeden geçmek üzere Eflak'a asker sevketmesi ihtimali vesilesiyle birdenbire Osmanlıların hududunu tecavüz ile Hotin ve Bender kaleleri üzerine gelerek oraları zabtetmesi neticesinde 1221 H. 1806 M. senesinde Rusyaya harp ilân olunmuş ve İngiliz sefirinin müracaat ve tehdidine ehemmiyet verilmemişti.

Napolyonun Ruslara galebesi ve Tilsit muahedesinin akti sırasında Rusların Osmanlılarla bir mütareke akdederek sulh yapmaları tekarrür eylediğinden Rusların, İsmail kalesi ve Tuna boyundaki muvaffakiyetsizlikleri ve Alemdar Mustafa paşanın galebesi neticesi olarak Tunayı aşamayan Ruslarla dokuz aylık bir mütareke aktedilmişti.

Bu Rus seferi ve mütareke sıralarında Osmanlı ordusunda ve

\* *Başveکہalet Arşivi* teşrifat defterlerinden, 676 numaralı defter (Bay Kâmil tasnifi).

devlet merkezinde bir çok müessif hadiseler vukua gelmiş, Nizam-ı cedit kaldırılıp Sultan Selim خلع hal' ve sonra şehid edilmiş, Alemdar İstanbula gelerek Dördüncü Mustafayı saltanattan indirüp İkinci Mahmudu tahta çıkarmış, arkasından çıkan bir karşı isyan üzerine yeniçeriler de Alemdarı şehid edüp tarafdarlarını öldürerek tekrar kurulan yeni nizamı da bozmuşlardı.

Bu dahilî hadiselerle uğraşan Osmanlı devleti, mütarekeden sonra hudutda esaslı bir hazırlık yapmayarak musalahaya ve Napolyonun dostluğuna bel bağlamıştı. Osmanlı devleti Ruslarla Parisde aktebilecek sulh murahaslığına Reis-ül-küttap Galip efendiyi tayin eylemek istedise de Napolyon, evvelce kendisini yakından tanıdığı bu zeki diplomatı istemediğinden anın yerine Paris sefiri Muhib efendi murahas olmuştu; bu zat safdildi; fakat Napolyon anın olmasını iyma eylediğinden ister istemez kabul edilmişti.

Napolyon eski taahhüdünde durmayarak, Türkiyeye dostluğu, Sultan Selimin şahsiyle ölçerek Osmanlı devletine gücendiğinden bahsile Ruslarla aramızı bulmamış ve devlet de bizzat Rusya devletine müracaat ederek müzakere istemişti; fakat Ruslar bu müracaat üzerine Fransa muzaheretinden mahrum kalan Osmanlı hükümetinden kabulü mümkün olmayan mütalebatta bulduklarından dolayı baş murahas tayin edilen Reis-ül-küttap Galip efendi avdete mecbur olmuştu.

Rus murahasları, kendilerile sulh aktebilebilmek için başlıca Eflak ve Buğdanın Rusyaya terkini istemişlerdi. Hatta gariptir ki Napolyon da aynı arzuyu izhar eylemiş olduğundan imparatorun bu döneklğine ve vefasızlığına karşı Osmanlı devleti kendi işini halletmenin çaresine bakup, Osmanlı murahasları gerek Eflak ve Buğdanın terkini ve gerek Sırbistan ile Çerkezistan hakkındaki ağır teklifleri reddederek avdet etmişler ve hükümet Ruslar taarruz edecek olurlarsa mukabele etmeğe karar vermişti.

Türk murahaslarının avdetinden sonra Rus başkumandanı İbrail ve Yergöğü üzerine kuvvet sevkeylemişlerse de mağlup olarak çekilmeğe mecbur olmuşlardı; işte bu hadise üzerine H. 1224 M. 1809 senesinde Ruslara harp ilân olunmuştu.

Âlemdar'dan sonra sadr-ı âzam tayin edilmiş olan Memiş paşa Serdar-ı ekremlik edecek kudrette olmayup âciz bir adam olduğundan azlolunarak sadarete, üçüncü Selim zamanında Mısır seferini

yapan Yusuf Ziya paşa tayin edilmiş idi. Aşağıda teşrifat defterinden naklettiğimiz Kapukulu ocaklarının sefere hareketleri merasimi bu sırada yapılmış ve Yusuf Ziya paşanın Mısır seferine giderken yapılmış olan ordu alayının bu seferde de aynen yapılmasına dair Padişahın şu iradesi alınmıştır.

**Hatt-ı hümâyun:**

*Tertip olunduğu üzere alay resminin icrasına  
izn-i hümâyunum olmuştur.*

Adâ-yı din ve devlet olan Rusyalu keferesi üzerine sefer-i hümâyun-u nusrat makrun tahakkuk eylediğine binaen bâ irade-i hümâyun Mısır seferine kıyasen devletlû sadr-ı âzam hazretleri serdar-ı ekremlik unvaniyle sebükbarca olarak orduy-ı hümâyunu bilistishab kefer-i hazelân karinin istilâ eylediği bilâd-ı islâmiyeyi bimennihi ve avn ve inayetihi taâlâ seyf-i şeriat-i garra ile tahlis ve ref'i tesallutları zımında bu def'a teveccüh ve azimet buyurmalarıyle sabıklarına mukayese ile tertip olunan resm-i teşrifattır.

**Tûğ-ı zafer fürûğ ve otağ-ı hazret-i Serdar-ı ekremî Davut paşa sahrasına alây-ı valâ ile mürurunda icra olunan resimdir. fi 21 sene 224 yevm-i çarşamba**

İrade buyurulan yevm-i meymenet tev'emde tayin olunan vakt-i muhtardan evvelce süvari ve piyade ocağ-ı âmirelerin tuğları ve konakçıları ve konakçı paşa bendeleri takımıyle alessheer bab-ı hazreti âsaftıye gelüp mevcut bulunmak üzere bir gün evvel cümlesine bâ tezakir tenbih olunup yevm-i mezkûrda mevcut olduklarında ber mutad-ı kadîm huzur-ı hazret-ı Serdar-ı ekremde seadetlû kethüda bey bendeleri ve Mir-i mirandan seadetlû konakçı paşa kullarına ferace samur kürkler ve sairlerine ber mucib-i defter-i teşrifat-ı hümâyun hil'atler ilbas buyrulduktan sonra vakt-i muhtar duhulünde müşarünileyh kethüda bey bendeleri ve sairleri heman esblerine süvar ve tertip olunan alay ile mehterhane-i sadr-ı âli verâlarınca çalarak Bab-ı âliden huruc ve Hasan paşa hanı önünden Divanyoliyle, Aksaraydan Murad paşa camii önünden, Yusuf paşa çeşmesinden ve Mollagüraniden, Şehremini tarikiyle Topkapusundan çıkılıp doğru Davutpaşa sahrasına mukaddemce nasbolunan hayme-i hazret-i asafi önüne nüzul olundukda amâde olunan müez-



zinler ve divanhane imamı fethi şerif kıraatine şürû ve hitamında dua ve tekmilinde tûğ-ı zafer fûruğ-ı hazret-i Serdar-ı ekremî mahal-line vaz ve sair ocağ-ı âmirelerin tûğları dahi mahalline vazolunup kurbanlar zebh ve otağ-ı hazret-i asafi nasbına mübaşeret ve şurû olunup seadetlû kethüda bey bendeleri yemeklik çadırına gelüp mevcut olanlar dâmenpus ile resm-i tebriki bâdelicra avdet ederler. Ve seadetlû kethüda bey bendeleri dahi otağ-ı Serdar-ı ekremî kurulup tanzimi hitaminedek ol mahalde tevakkuf ve bâdehu ber mucib-i defter-i teşrifat iktiza eden hil'atler ilbas ve avdet olunacağı.

**İhrac-ı orduy-ı ocağ-ı âmire-i yeniçeriyân-ı dergâh-ı âlî  
fi 19 câ [cemaziyel'evvel] 224 yevm-i pazartesi**

Tâyin buyurılan vakt-ı sâd-i mübarekde dergâh-ı âlî yeniçerileri ocağından bu def'a bâ irade-i aliyye gidecek ortalar mürettep alaylarıyla kasr-ı alay-ı hümâyunun altından mürurlarında ilerude yürüyen rüesa ve çorbacıları ve sair zabitanı, Alay köşkû altına gelmezden mukaddem Soğukçeşme kapusu önünde atlarından nüzul ve alâmeratibihim hil'atlar ilbas olundukca çavuşbaşı ağa ve Kethüday-ı bevabîn-i şehriyarî ağa destar-ı âdi ve ber muktezay-ı mevsim sof ferace ve sim asâlarıyle önlerine düşüp kasr-ı hümâyun pişgâhında bir def'a zemînpus ittirilüp kasr-ı hümâyunu mürur eyledikde yine atlarına süvar ve alaya mülhak olurlar ve rikâb-ı hümâyun ağalarıyle maan Muhzır ağa dahi Soğukçeşme kapusu önünde mevcut olup zikrolunan hil'atleri mumaileyh marifetile ilbas ittirmekle yeniçeri ağası geldikde Soğukçeşme kapusu önünde Çavuşbaşı ağa ve Kethüday-ı bevabîn-i şehriyarî ağa istikbal ve ağay-ı mumaileyh esbinden nüzul ve emr-i hümâyun buyrulduğu üzre önünce bab-ı merkumdan duhul ve huzur-ı hümâyuna götördüklerinde huzur-ı hazret-i cihandârîde yeşil çuhaya kaplı ferace samur kürk ilbas buyrulup iade olundukda yine ağayan-ı mumaileyhima önlerince bab-ı merkumdan çıkup atına süvar ittirdiklerinde seadetlû yeniçeri ağası bendeleri süvar ve ağayan-ı mumaileyhima bendeleri piyade önünce kasr-ı hümâyun önüne vardıklarında seadetlû yeniçeri ağası bendeleri at üzerinde rikâb beraberî temenna ve zemînpus ve ağayan-ı mumaileyhima dahi maan zemînpus iderler. İşbu alayda dahi ikiyüz on üç tarihinde olduğu misillû yeniçeri ağası bendeleri al sâye kaput ve sairleri destar-ı âdi ve saye kaputlar ve kemer rahtlû esbleriyle mürur iderler. Ve

sabıkları misillü orta sakalarına ve beher ortanın kara kullukçularına ve aşçılara ve bazı dervişana Soğukçeşme kaptanı önünde seadetlü hazine Kethüday-ı şehriyarî ağa bendeleri marifeti ve teşrifatî kulları yediyle taraf-ı hümâyundan atıyyeler ihsan olunduğu.

Dergâh-ı âlî yeniçeri ocağından memurlar ve yeniçeri ağası mürettep alaylarıyla ağa kaptanından huruc ve Divanyoliyle Soğukçeşme önüne geldiklerinde hil'atlar ilbas ve atâyâları ita olunarak Alay köşkü altından gubar ve Hocapaşadan, Ketenciler ve Kantarcılar içinden, Zeyrek başından, Sepetciler içinden, Aksaraydan, Murad paşa ve Yusuf paşa çeşmesinin önünden Mollagürani yolile, Şehiremini tarikiyle Top kaptanından çıkıldıktan sonra kendilerine mahsus olan ordularına varup haymenişin olacakları.

**İhrac-ı Orduy-ı Ocakhây-ı Cebeciyan ve Topcıyan  
ve Arabacıyan ve Humbaracıyan ve Lağımçıyan-ı  
Dergâh-ı âlî fi 20 ca. 224 yevmi salı**

Dergâh-ı muallâ Yeniçerileri ocağının Alay kasr-ı hümâyun-ı altından mürûrlarının ferdası günü Cebeci ve Topcu ve Arabacı ocağı âmireleri dahi kaideleri üzre alettirtip Alay kasr-ı hümâyunu altından mürûr ider iken mutat üzre [silik] Çorbacıyan ve rüesa ve zabitlerine hil'atlar ilbas ve Cebeci ve Topcu ve Arabacı baş ağalar Soğukçeşme kaptanı önünde esplerinden nüzül ve hil'atlar ilbas ve üslûb-ı sabık üzre zeminpus ittirilüp Humbaracı, Lağımçı baş ağalar memur olmayıp Ocakbaşı çavuşları ve bazı hulefa ve neferat memur olmalarıyla işbu alayda ağaları gelmeyip memur olan başçavuşları mutat üzre Soğukçeşme önünde esplerinden nüzül ile hil'atları ilbas ve zeminpus şerefiyle müşerrefen mürûr eyleyecekleri ve Yeniçeri ocağı misillü bunların dahi orta sakaları ve aşçuları ve karakullukçuları ve dervişanına taraf-ı hazret-i şahane-den atıyye-i hümâyun ihsanı.

Ve zikrolunan Cebehane ve Topcıyan ve Arabacıyan ve Humbaracı ve Lağımçı ocaklarından memur olan zabitanı ve neferatlarıyla alessheher Sultanahmet meydanında cem olup bâlâda mezkûr alaylarıyla Kasr-ı alay-ı hümâyunu mürûr ve kendü orduy-ı mahsusalarında haymenişin olacakları malûm-ı âlîleri buyuruldukta emr-ü ferman hazret-i veliyyümrindir.

**Devletlû Sadr-ı âzam ve Serdar-ı Ekrem Hazretlerinin  
Alây-ı vâlâ ile Davud Paşaya âzimetleri resmidir  
22 ca. 1224 yevm-i perşembe**

**İbtida** Kılağuz çavuşu yamağı, teliyle

**Bâdehu** Subaşı ve Asesbaşı ağalar ruzmerre kıyafet ve neferatı önlerince ellerinde değnekleriyle

**Bâdehu** Tatârân-ı Asafî ve Tatar ağası kisve-i mahsusalarıyla

**Bâdehu** Delil ve Gönüllüyan neferatı ve ağaları elbise-i mahsusalarıyla

**Bâdehu** Çavuşan-ı Dîvânı Hümâyun telleriyle

**Bâdehu** Ağayan-ı Asafî

**Bâdehu** Sağda Gediklû Müteferrikagân ve solda Gediklû çavuşan ellerinde değnek ve topuz ve cümlesi destar-ı âdi ve kaputlarıyla

**Bâdehu** ehl-i menasibın, Anadolu muhasebecisi efendiye kadar efendiler ikişer ikişer kafesî destar ve ber mukteza-yı mevsim sof ferace ve kemerî rahtlû espler ile, fakat seferber olan efendiler çatal destar ve sâye kaput ve hademeleri müsellağ olarak

**Bâdehu** Müderrisin-i kiram ikişer ikişer küçük tepeli destar ve sof ferace ve saçaklı espler ile

**Bâdehu** Ruznâmçe-i evvel ve Muhasebe-i evvel ve Muhasebe-i haremeyn ve Muhasebe-i cizye ve Şehremini ve Tersane Emîni ve Darphane Emîni ve Tophane Nazırı ve Baruthane Nazırı ve Matbah Emîni ve Arpa Emîni [seferber olduklarına binaen destar-ı âdi ve sof ferace ve kemer rahtlû espleriyle].

**Bâdehu** Kapucubaşı ağalar ve Mîr-i alem-i hassa ağa [bunlar dahi]

**Bâdehu** Üsküdar dan [yani Üsküdar kadılığından] Mekke-i Mükerrmeye varıncaya kadar bilcümle Mevali-i kiram efendiler alettirip [küçük tepeli destar ve sof ferace ve saçaklı esp ile]

**Bâdehu** Kılağuz çavuşu ağa, teliyle.

**Bâdehu** Hazret-i Serdar-ı ekreminin kalkansız yedekleri ve mirahurları



**Bâdehu** Ser bölük-i bevvabin-i Hazret-i Serdar-ı ekremî ağa ve tuğlar ve bayraklar ve önlence sipah ve silâhdar ocaklarının tuğlar ve bayrakları [ağay-ı mumaileyh destar-ı âdi ve sâye kaput ve seyf ve etbaları müsellâh olarak]

**Bâdehu** Muhzır ağa ortası bayrağıyle [kırk nefer harbeci neferatı pûşi ve dolama ve ellerinde harbe'leriyle]

**Bâdehu** Hazret-i Serdar-ı ekremînin kalkanlı yedekleri

**Bâdehu** Tevkif ve Defter Emîni efendiler [seferber olduklarına mebni kafesî destar ve sof ferace ve kemer rahtlu espleriyle]

**Bâdehu** Şikk-ı sani ve Şikk-ı salis efendiler [bunlar dahi]

**Bâdehu** Şikk-ı evvel Defterdarı Efendi [seferber olduğuna mebni çatal destar ve şemse al sâye kaput ve seyf ve kemer rahtlu esb ve etbailerî müsellâh olarak]

**Bâdehu** İstanbul kadısı ve mâ'zul ve payelüleri efendiler hazaratı [küçük tepeli destar ve sof ferace ve saçaklı espleriyle]

**Bâdehu** Sudur-ı izam [Kazaskerler] efendiler hazaratı [bunlar dahi]

**Bâdehu** Vezir-i mükerrerem Kaymakam Paşa Hazretleri [destar-ı âdi ve sof ferace ve kemer rahtlû esp ve rikâplarında Şâtıran ve matraciyan ve tüfenkciyan ve çuhadarlarıyle ve kapucular kethüdası ve selâm ağası pişrevlerinde ve veralarında iki nefer gedik ağaları]

**Bâdehu** Çavuşlar kâtibi ve emîni ağa [seferber olmadıklarından destar-ı âdi ve sof feraceleriyle]

**Bâdehu** Hazret-i Serdar-ı ekremînin kapucular kethüdası ve selâm ağası ağalar [seferber olduklarına mebni destar-ı âdi ve al sâye kaput ve seyf ve kemeri rahtlu esp ve hademeleri müsellâh olarak]

**Bâdehu** Mektubî ve teşrifâtî efendiler [bunlar dahi]

**Bâdehu** tezkire-i evvel ve sanî efendiler [seferber olduklarına mebni destar-ı kafes ve ber muktezay-ı mevsim sof ferace ve kemer rahtlu espler ile]

**Bâdehu** Reisülküttab Efendi [efendi-i müşarünileyh seferber olduğına mebni çatal destar-ı âdi ve şemseli al sâye kaput ve

kemer rahtlu esp ve seyf ve hademeler müsellâh olarak] ve Çavuşbaşı ağa [ağa-yı mumaleyh seferber olduğına binaen destar-ı âdi ve sof ferace ve kemer rahtlû esp ile]

**Bâdehu** Devletlû inâyetlû Sadr-ı âzam, Serdar-ı ekrem hazretleri ve verâlarında gedik ağaları [Hazret-i Serdar-ı ekremî çatal destar ve murassa şemseli al sâye kerrake kaput ve ağır rahtlu esp ve rikâblarında yürüyen çuhadar müsellâh ve beyaz kavuk ve siyah pûşi ve şâtıran ve mutahhareciyan [matraciyan] ve tüfenkciyan ruzmerre kıyafet ve ellerinde hıştlar ve kapu kethüdaları dahi hıştlar ve Muhzır ağa kalafat ve kaput ve odabaşı ağa kaput ve baratalariyle]

Ve semâhatlû Şeyh-ül islâm hazretleri هم‌عنان hem inan. [hazret-i fetvapenah küçük tepeli destar ve sof ferace ve saçaklı esp ile]

**Bâdehu** Ketküda Bey [Sadr-ı âzam kethüdası] hazretlerinin yedekleri ve mirahurları

**Bâdehu** Sipah ve silâhdar ocaklarının kâtip ve kethüdaları ve önlerince bölükât-ı erbaa kâtip ve kethüdaları [seferber olduklarına mebni kâtipleri çatal destar ve sairleri destar-ı âdi ve cümlesi al sâye kaput ve seyf ve kemer rahtlu espler ile ve hademeleri müsellâh olarak]

**Bâdehu** Sipah ve silâhtar ağaları ve önlerince bölükât-ı erbaa ağaları [bunlar dahi]

**Bâdehu** Alay başçavuşu ağa [çatal destar ve sâye kaput ile]

**Bâdehu** Saadetlû Kethüda Bey hazretleri veralarında kâtib-i kethüda efendi ve enderun ağvatı ve sair ricalin ağayan-ı enderunı [kethüda bey destar-ı âdi ve şemseli al sâye kerrake kaput ve seyf ve çuhadarları müsellâh olarak. Kethüda kâtibi efendi çatal destar ve sâye kaput ve seyf ve kemer rahtlu esp ve hademeleri müsellâh olarak]

**Bâdehu** Mehterhane-i tabl-u alem-i serdar-ı ekremî

**Bâdehu** Sipah ve silâhdar ocağı çavuşları ve ocaklısu bayrağıle

İşbu alay resmi âdet-i kadime-i müstahsene ve şan ve şükûh-ı saltanat-ı seniyyeden olmak mülâbesesiyle sabıklarına mukayese ile tertip olunduğuna binaen derun-ı alayda mevcut bulunan bilcümle



zevat saray-ı hümâyunda mevcut bulunmalarıçün bir iki gün mukaddem tezkire neşriyle ihbar olunur ve semahatlû Şeyhül islâm efendi hazretleri yalnız haberci çavuş kulları delâletiyile saray-ı hümâyuna teşrif ve cây-ı mahsusalarında ârâm ve müterekkib-i hazreti serdar-ı ekremî olurlar. Müşarünileyh sadr-ı âzam ve serdar-ı ekrem hazretleri Bab-ı âliden hareket ve saray-ı hümâyuna teşriflerinde doğru huzur-ı şahaneye duhul iderler ve sair mevcut bulunan vüzeray-ı izâm hazaratı huzur-ı hümâyuna duhul ve mukaddemce huruc iderler.

Devletlû sadr-ı âzam hazretlerine nezd-i hazret-i şahanede seraser kürk maa üstlük ilbas ve mücevher seyf ve tirkeş miyan-ı gayreti serdar-ı ekremiye bend ve ihsan ve semâhatlû şeyhülislâm efendi hazretlerine dahi ferve-i beyza iksa ve vesayây-ı şahane irad ve beyan ve hitamında izn-i hümâyun suduriyle huzur-ı hümâyundan huruc birle seadetlû Darüssaadet-iş-şerife ağası hazretleri mevkiflerinde dahi ârâmdan sonra avdet ve orta kapudan beraberce esplerine ve peykân ve solakan ve balâda mezkûr alay-ı valâ ile Divanyolundan ve Aksaraydan doğru Topkapusundan huruc ve Davudpaşada orduy-ı zaferbûye azimet ve nasbolunan otağ-ı süreyya nıtak-ı serdar-ı ekremiye nüzul buyururlar.

Ve erbab-ı alay cümlesi esplerinden nüzul ve damenpus-ı hazret-i asafî ile nail-i meram ve me'mul olup faziletlû sudur-ı izâm ve İstanbul ve mazul payelüleri ve Nakib-ül eşraf efendiler hazaratı huzur-ı hazret-i serdar-ı ekremîde ik'ad ve kahve rüsumu icrasından sonra buhur resmi dahi icra ve avdet iderler; bâdehu saadetlû Kaymakam Paşa hazretlerine huzur-ı devletlerinde seraser kürk ilbas buyrulmağla müşarünileyh hazreti Kaymakam Paşa huzur-ı hazret-i serdar-ı ekremiden huruc ve avdet buyurdıklarında ferve-i mezkûru arkalarından çıkarup esplerine süvar ve doğru Takyeciler cami-i şerifine azimet buyurup rikâb-ı hümâyun hademe-i Babîâlisi cami-i şerif-i mezkûrda mukaddemce âmade ve müterakkib olmalarıyle müşarünileyh Kaymakam Paşa hazretlerini istikbal ve kahve resmi icrasiyle bir miktar teneffüs olunduktan sonra hademe-i Babîâli-i rikâb-ı hümâyun atlarına süvar ve saadetlû Kaymakam Paşa hazretlerinin kaide üzre önlerine düşüp Âsitaneye dühullerinde mutat üzre kol olup es'ara bakılarak Babîâliye duhul ve mesned-i kaymakamiye kuûd iderler.

10 C. [Cemaziyelâhır] yevm-i pazar tarihinde Davudpaşa sahrasından hareketlerinde şevketlû efendimiz hazretleri teşrif itmeyüp fakat Haseki ağa delâletiyle taraj-ı şahaneden hat-tı şerif ile donanmış bir reis esp ve bir kıt'a mücevher saat gelüp hat-tı şerif cehren kıraat ve telhis gönderilüp ağa-yı mumaileyhe kontoş samur ve bin kuruş atıyye ve has ahurdan dört nefer kimesneye yüz kuruş bahşış verilüp avdetleri ve kapu takımıyla saadetlû Kıymakam Paşa hazretleri ve Rikâb-ı hümayun defterdarı takımıyla gelüp Davudpaşadan yarım saat kadar resmen gidilüp bâ ruhsat esnây-ı rahda rikâp takımına izin verilmekle cümlesi esplerinden nüzul ve دعاء, vedâ zımında damenpus-ı serdar-ı ekremî olup avdetleri

Devletlû Sadr-ı âzam ve Serdar-ı ekrem hazretleri Davud Paşa sahrasından savb-ı maksude azimetleri günü Mısır seferinde Üskü-darda Mehmed Paşa köşküne teşrif buyrulduğuna kıyasen şevketlû kerametlû mehâbetlû kudretlû Padişah-ı âlempenah müeyyd min indillâh efendimiz hazretleri orduy-ı hümayun civarında olan Davud Paşa Sarayında vaki kasr-ı hümayunu teşrif-i mülükânelerile tezyin buyurduklarından sonra taraf-ı hazret-i şahanelerinden bir kulları tâyin ve Serdar-ı ekrem hazretlerini davet ve müşarünileyh hazretleri evkat-ı sairede olduğu misillü rikâb-ı hümayuna ruhsude-i ubudiyet eylemek için maiyyet-i serdar-ı ekremide olan kapu ricali kullariyle esplerine süvar ve doğru kasr-ı vâlâ-yı hazret-i cihandariye azimet ve sen-ği rikâbda nüzul ve müşarünileyh hazretleri huzur-ı şahaneye duhul ve ruhsûde-i hâkîpa-yı hümayun ile nail-i meram ve nüvaziş ve iltifat-ı şahaneye mazhariyetle mesrur ve şadgâm olup taraf-ı hazret-i cihandariden ikarâmen ve taltifen bir sevb erkân samur-ı faizüssürur iksâ ve izn-i hümayun sudurunda müşarünileyh hazretleri resm-i veda-ı ubudiyeti icra için kadem-i pak-i hazret-i zillullahiyi takbil ve telsim ederek avdet ettiklerinde taraf-ı şahaneden bir re's müzeyyen esb-i saba reftar dahi sen-ği rikâbda âmade olmağla müşarüniley rikâp ve licamını takbil ederek süvar ve avdet ve otağ-ı Âsafiyi teşrif, bu esnada müşarünileyh hazretlerini teşyi için otağ-ı âsafânede mevcut bulunan saadetlû Kaymakam Paşa ve hademe-i bab-ı âli ve rical-i orduy-ı hümayun süvar ve kendilerine mahsus alay ile azimet ve İncirli nam mahalle vardıklarında tevakkuf ve müşarünileyh kaymakam paşa hazretleri ve rical-i bab cümlesi veda zımında damenpus-ı serdar-ı ekremî ile müstesad ve cümlesine izin virilüp avdet ittikle-

rinde müşarünileyh sadr-ı âzam ve serdar-ı ekrem hazretleri zatlarına mahsus takım ile bilyümn-i vezzafer savb-ı maksude azimet buyuracakları malûm-ı âlileri buyruldukta emir-ü ferman hazret-i veliy-yülemrindir.

\* \* \*

İşte bu teşrifat kaydının arzı üzerine vesikanın baş tarafındaki hatt-ı hümayun ile alayın yazıldığı gibi yapılmasına irade sadır olmuştur.

---



